

香港防止虐待長者協會
善終服務支援中心

提交立法會食物安全及環境衛生事務委員會
於二零一零年九月二十日舉行的特別會議
就討論「《骨灰龕政策檢討公眾諮詢文件》」意見書

人生自古誰無死！俗語有話，生養死葬。可惜，我地作為香港人，「生養」固然難，「死葬」就更加難！政府骨灰龕位供一直唔夠；私人經營嘅又經常被揭係違法經營，一個唔覺意，政府話要迫遷走鬼嘅話，真係做鬼都唔靈！

早前，曾特首好似「玩鋪勁」咁行出黎講：「十八區都要有骨灰龕」嘅希望工程。我哋同理好多等梗骨灰位市民，真係對特首呢個英明決定，拍爛手掌，舉腳支持；點知，各區唔係街坊反對，就係教育局阻頭阻勢，講乜嘢唔會動用公帑為非學校活動購買保險。結果，搞到十八區撞板。

為左老百姓，唔會百年歸老之後，統統變晒游魂野鬼。我地認為政府應該立即強政厲治，收尾呢兩年任期，立即承諾每年興建三萬五個公營陰宅，使到先人可以「居者有屋龕」，唔駛再做游魂野鬼或者無主孤魂！

搞到今日要上嚟立法會開會，主要係因為政府公營灰位遠遠滿足唔到需求，市民咪惟有幫襯私營囉。但係私營灰位，開到好似便利店咁，違規經營骨灰龕週圍都有。住宅有、農地有、郊野公園都有，連佛門清淨地都有，原本靈氣逼人嘅地方，一個唔該就會淪為烏煙瘴氣。凡人固然受害，神佛同樣遭殃；其實，我地根本唔知邊啲灰位買左有手尾跟，一旦唔好彩中左招，破財事小，先人「死無葬身之地」事大呀！死就死在政府長期闊佬懶理，搞到亂七八糟，一個二個非法經營，大發死人財，仲搞到成日有人上街示威，真係全球罕見。

骨灰龕政策諮詢期仲有幾日，但政府原定公布嘅表格一及表格二嘅私營骨灰龕名單，梁卓偉副局長對記者講，因為好多複雜嘅法律問題，只能夠講承諾「盡快公布」；仲話如果市民唔好彩中招買咗非法龕位，政府唔會應承日後可以優先轉用公營龕位，我地梗係支持喇！梁副局長都講喇，唔合規定嘅骨灰場仲多過合格嘅，容乜易個個都起骨灰龕，賣埋「龕花」，無良商人掠完一筆後，出咗問題嘅話，唔通要我地納稅人比錢埋尾咩！

最後，我地同時反對政府收取公營龕位牌費，無錢比就撒先人灰，咁同政府掘人祖墳有乜分別呀。政府以高地價政策，令生者難置其屋，而死者亦難有其龕；確係眾生皆苦，窮有窮悲，富有富哀，在生之時有啖好食，離世之後無法安息。我地希望政府可以大發慈悲，立即實行骨灰龕位發牌制度，唔好再比機會無良商人掠我地一筆，咁就萬民之福喇！

香港防止虐待長者協會
善終服務支援中心
20-09-2010